

五礼通考

第六
卷九
册

五禮通考卷第一百二十

內廷供養禮部侍郎金匱秦蕙田編輯

兩淮都轉鹽運使德水廬曾

參校

李天保總纂輯鄒瑩桐城方觀承同訂

直隸按察司副使元和宋完

嘉禮三

上尊號

蕙田案尊號起於唐武后中宗之世始以卽位繼以拜洛受圖後乃往往以符瑞行之元宗開元天寶以來殆數數矣然其儀不傳宋每遇大禮羣臣輒上表請至于再三自太祖太宗以還沿爲故事宋史著其儀爲嘉禮第一至神宗哲宗乃毅然止之遼始於太祖厥後相繼不絕金初猶舉之逮章宗堅卻不受其事乃罷元上尊號者五帝而已自明以來

蓋無聞焉今於卽位儀後附及之

唐書則天后本紀光宅元年二月甲子皇帝率羣臣上尊號於武成殿

通鑑太后御武成殿皇帝帥王公以下上尊號

蕙田案上尊號始此

垂拱四年五月乙亥加尊號爲聖母神皇

通鑑武承嗣使鑿白石爲文曰聖母臨人永昌帝業末紫石雜藥物填之使雍州人唐同泰奉表獻之稱獲之於洛水太后喜命其石曰寶圖擢同泰爲遊擊將軍五月戊辰詔當親拜洛受寶圖有事南郊告謝昊天禮畢御明堂朝羣臣命諸州都督刺史及宗室外戚以拜洛前十日集神都乙亥太后加尊號爲聖母神皇

天授元年九月改國號周大赦改元乙酉加尊號曰聖神皇帝長壽二年九月乙未加號金輪聖神皇帝延載元年五月甲午加號越古金輪聖神皇帝天冊萬歲元年正月辛巳加號慈氏越古金輪聖神皇帝

久視元年五月癸丑大赦改元罷天冊金輪大聖號

蕙田案罷尊號始此

長安五年正月丙午皇帝復於位丁未徙后於正陽宮戊申上后號曰則天大聖皇帝

中宗本紀神龍元年十一月戊寅上尊號曰應天皇帝皇后曰順天皇后

景龍元年八月丙戌上尊號曰應天神龍皇帝皇后曰順天聖皇后

元宗本紀開元元年十一月戊子羣臣上尊號曰開元
神武皇帝大赦改元二十七年二月羣臣上尊號曰
開元聖文神武皇帝大赦免今歲稅賜文武官階爵版
通鑑羣臣請加尊號曰聖文二月己巳許之因赦天
下免百姓今年田租

天寶元年正月甲寅陳王府參軍田同秀言元元皇帝
降於丹鳳門通衢二月丁亥羣臣上尊號曰開元天寶
聖文神武皇帝辛卯享元元皇帝於新廟大赦

通鑑田同秀上言見元元皇帝於丹鳳門之空中告
以我藏靈符在尹喜故宅上遣使於故函谷關尹喜
臺旁求得之壬辰羣臣上表以函谷靈符潛應年號
先天不違請於尊號加天寶字從之

十三載二月壬申朝獻太清宮加上元元皇帝號曰大

聖祖高上大道金闕元元天皇帝甲戌羣臣上尊號
曰開元天地大寶聖文神武證道孝德皇帝大赦

至德三載上號曰太上至道聖皇天帝

肅宗本紀乾元元年正月戊寅上皇天帝御宣政殿授
皇帝傳國受命寶符冊號曰光天文武大聖孝感皇帝
通鑑上皇御宣政殿授冊加上尊號上固辭大聖之
號上皇不許上尊上皇曰太上至道聖皇天帝
二年正月己巳羣臣上尊號曰乾元大聖光天文武孝
感皇帝

通鑑乾元二年二月壬子月食既先是百官請加皇
后尊號曰輔聖上以問中書舍人李揆對曰自古皇
后無尊號惟韋后有之豈足爲法上驚曰庸人幾誤
我

上元二年九月壬寅大赦去乾元大聖光天文武孝感號

一通鑑壬寅制去尊號但稱皇帝去年號但稱元年代宗本紀廣德元年七月壬寅羣臣上尊號曰寶應元聖文武孝皇帝壬子大赦改元

通鑑注以楚州所獻十三寶爲上登極之符應也

德宗本紀建中元年正月丁卯改元羣臣上尊號曰聖神文武皇帝

興元元年正月癸酉大赦改元去聖神文武號

順宗本紀永貞元年八月庚子立皇太子爲皇帝自稱

太皇皇帝元和元年正月皇帝率羣臣上尊號曰應乾聖

皇帝

通鑑百官請上尊號曰文武大聖孝德皇帝上許上

上皇尊號而自辭不受

憲宗本紀元和三年正月癸巳羣臣上尊號曰睿聖文武皇帝十四年七月己丑羣臣上尊號曰元和聖文神武法天應道皇帝大赦

穆宗本紀長慶元年七月壬子羣臣上尊號曰文武孝德皇帝

敬宗本紀寶歷元年四月癸巳羣臣上尊號曰文武大聖廣孝皇帝大赦賜文武官階勳爵

蕙田案敬宗弟文宗在位十四年未上尊號

武宗本紀會昌二年四月丁亥羣臣上尊號曰仁聖文武至神大孝皇帝大赦賜文武官階勳爵

宣宗本紀大中二年正月甲子羣臣上尊號曰聖敬文思和武光孝皇帝大赦賜文武官階勳爵

懿宗本紀咸通三年正月庚午羣臣上尊號曰睿文明
聖孝德皇帝大赦 十一年正月甲寅羣臣上尊號曰
睿文英武明德至仁大聖廣孝皇帝大赦
僖宗本紀乾符元年十一月庚寅改元羣臣上尊號曰
聖神聰睿仁哲明孝皇帝

光啟元年五月羣臣上尊號曰至德光烈皇帝

昭宗本紀大順元年正月戊子羣臣上尊號曰聖文武
德光武宏孝皇帝大赦改元

蕙田案上尊號自武后始後遂奉爲故事唐
一代之君循行之其不行者一二帝而已

右唐

宋史太祖本紀乾德元年十一月甲子有事南郊大赦
改元百官奉玉冊上尊號曰應天廣運仁聖文武至德

皇帝即建隆四年

宋史禮志尊號之典唐始載於禮官宋每大祀羣臣詣東上閣門拜表請上尊號或三上或五上多謙抑弗許如允所請卽奏命大臣撰冊文及書冊寶其受冊多用祀禮畢日御正殿行禮禮畢有司以冊寶詣閣門奉進入內建隆四年羣臣三上表上尊號詔俟郊畢受冊前三日遣官奏告天地宗廟社稷遂爲定制其儀有司宿設崇元殿仗衛文武百官竝集朝堂之次攝太尉奉冊於案吏部侍郎一員押司徒奉寶於案禮部侍郎一員押以五品六品清資官充舉冊舉寶官皆承之以匣覆之以帊俱詣殿門外之東太尉之前大樂令帥工人入就位諸侍衛官及宰執兩制供奉等官立於殿階下香案前左右如常入閣儀侍中奏中嚴外辦所司承旨索

扇扇上皇帝袞冕御輿出自西房樂作卽御坐扇開樂止符寶郎奉寶如常儀禮直官通事舍人分引太尉以下文武羣官應北面位者各就橫行位太常卿於冊案前導至丹墀西階上少東北面置訖太尉司徒吏部禮部侍郎各入本班立定典儀贊百官再拜舞蹈三稱萬歲又再拜起居訖又再拜分班序立禮直官引太常卿隨行吏部侍郎押冊案以次序行太尉從之禮部侍郎次押寶案行司徒從之詣西階至解劔褥位其讀冊中書令讀寶侍中候冊案將至先升於前楹閒第一柱北對立太尉解劔脫舄訖吏部侍郎押冊案先升太尉從升當御坐前太尉摺笏北面奉冊案稍前跪置訖俛伏興少退東向立中書令進當冊案前讀冊訖俛伏興又摺笏奉冊於褥東向冊函北向進跪置御坐前與舉冊

官降還侍立位太尉亦降納舄帶劔禮部侍郎押寶案
升司徒隨升北面跪置侍中讀寶訖置冊之南俱復位
其納舄帶劔俛伏一如上儀典儀贊在位官皆再拜禮
直官通事舍人引太尉至西階下解劔舄升當御坐前
跪賀其詞中書門下撰賀訖復位皆再拜如讀冊寶儀侍中升至
御坐前承旨退臨階西向稱有制典儀贊再拜訖宣曰
朕以鴻儀昭舉保命會昌迫於羣情祇膺顯號退循寡
昧惕懼增深所賀知宣訖復位典儀贊再拜舞蹈三稱
萬歲又再拜訖侍中升階奏禮畢降復位扇上樂作帝
降坐御輿入自東房扇開樂止侍中版奏解嚴中書侍
郎帥奉案官升殿跪奉冊置於案次門下侍郎奉寶如
奉冊禮通事舍人贊引詣東上閣門狀進所司承旨放
仗百官再拜訖退如常儀自後受冊皆如之禮畢賜百

官食於朝堂

太祖本紀開寶元年十一月癸卯有事南郊改元開寶
宰相普等奉玉冊寶上尊號曰應天廣運大聖神武明
道至德仁孝皇帝

太宗本紀太平興國三年八月甲戌羣臣請上尊號曰
應運統天聖明文武皇帝十一月丙申祀天地於園丘
大赦御乾元殿受尊號 六年冬十月癸酉羣臣三奉
表上尊號曰應運統天睿文英武大聖至明廣孝皇帝
十一月辛亥祀天地於園丘大赦御乾元殿受尊號內
外文武加恩

雍熙元年九月壬戌羣臣表三上尊號曰應運統天睿
文英武大聖至仁明德廣孝皇帝不許宰相叩頭固請
終不許

蕙田案宋卻尊號自太宗始也

端拱二年十二月庚申詔令四方所上表祇稱皇帝羣臣請復尊號不許辛酉上法天崇道文武皇帝詔去文武二字餘許之

淳化三年九月乙卯羣臣上尊號曰法天崇道明聖神孝文武皇帝凡五表終不許

至道元年十二月甲戌羣臣奉表加上尊號曰法天榮道上聖至仁皇帝凡五上不許

眞宗本紀咸平二年八月乙卯羣臣上尊號曰崇文廣武聖明仁孝皇帝十一月丙戌祀天地於圜丘御朝元殿受尊號冊丁亥賜羣臣帶服鞍馬器幣有差

大中祥符元年六月天書再降於泰山醴泉北壬寅迎天書於含芳園辛亥羣臣表上尊號曰崇文廣武儀天

尊道寶應章感聖明仁孝皇帝十二月辛卯御乾元殿受尊號

蕙田案宋上尊號多在卽位郊天之後是年十月封禪辛卯駕發京師十一月丁丑至自泰山奉天書還宮遂行受尊號之禮不關郊祀也

五年冬十月丙子羣臣上尊號曰崇文廣武感天尊道應眞佑德上聖欽明仁孝皇帝

天禧三年七月壬申羣臣上尊號曰體仁御極感天尊道應眞寶運文德武功上聖欽明仁孝皇帝十一月辛未祀天地於圜丘大赦丁丑御天安殿受尊號

乾興元年正月改元二月大赦癸卯上尊號曰應天尊道欽明仁孝皇帝

仁宗本紀天聖二年十一月丁酉祀天地於圜丘大赦百官上尊號曰聖文睿武仁明孝德皇帝

明道二年二月丁未祀先農於東郊躬耕藉田大赦百官上尊號曰睿聖文武體天法道仁明孝德皇帝

蕙田案耕藉成上尊號史所謂大禮後故事

也

景祐二年十一月乙未祀天地於圜丘上尊號曰景祐體天法道欽文聰武聖仁孝德皇帝 寶元元年十一月庚戌祀天地於圜丘百官上尊號曰寶元體天法道欽文聰武聖仁孝德皇帝

皇祐二年三月戊子朔詔季秋有事於明堂己丑以大慶殿爲明堂戊戌詔明堂禮成羣臣毋上尊號

蕙田案是年九月始大享明堂三月之詔蓋

預止之也

嘉祐四年六月己巳羣臣請加尊號曰大仁至治表五上不許

英宗本紀治平二年七月己卯羣臣五上尊號不允

四年春正月羣臣上尊號曰體乾膺厯文武聖孝皇帝神宗本紀熙寧元年七月己卯羣臣三表請上奉元憲道文武仁孝之號不許

禮志熙寧元年宰臣曾公亮等上表請加尊號詔不允先是翰林學士司馬光言尊號起唐武后中宗之世遂爲故事先帝治平二年辭尊號不受天下莫不稱頌聖德其後佞臣建言國家與契丹常有往來書彼有尊號而中國獨無足爲深恥於是羣臣復以非時上尊號論者甚爲朝廷惜之今羣臣以故事上尊號臣愚以爲陛